

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XXXIX Blg. 13  
Hulyo 7, 2008  
[www.philippinerevolution.net](http://www.philippinerevolution.net)

Editoryal

## Gloria Arroyo—tuta na, wala sang balatyagon pa

**M**akasuluka kag makaulugot ang ginapakita nga sobra nga pag-ikog-ikog ni Arroyo sa iya imperyalista nga amo sang magbisita siya sa US sining ulihi nga simana sang Hunyo. Sa kainitan sang pagpanghalit sang bagyo “Frank” sa Pilipinas, ginpatuyangan ni Arroyo ang kabang-manggad sang banwa sa wala kapuslanan, magasto kag garboso nga pagbyahe. Lapnagon nga kaakig kag wala-tuo nga pagpakamalaut ang ginbunga sang sobra niya nga wala pagkabalaka sa interes sang nagakalisod nga pumuluyong Pilipino. Gintinguhaan nga pugaon ni Arroyo ang anuman nga mapuga pa halin sa pagpakigkita niya sa iya amo nga si George W. Bush nga pareho niya ara sa nagahinunod na ang kagamhanan. Nag-amot ang iya amo sang haluson \$100,000 kag ginpadala ang nukleyar nga barko-de-gera nga USS Ronald Reagan bilang bulig kuno sang US sa mga biktima sang bagyo “Frank” kag paglugdang sang pangpasahero nga barko nga MV Princess of the Stars.

Pero ang labi nga ginapuntirya ni Arroyo sa pagkadto sa US amo ang temprano nga paglangis sa duha ka pangunahon nga kandidato sa eleksyon presidensyal didto subong nga tuig—sanday John McCain sang Republican Party ni Bush kag Barack Obama sang oposisyon nga Democratic Party. Sa pilit nga paglagas nga mahatagan siya sang pagta-

mod sang mga ini, daw langaw si Arroyo nga nagasunod-sunod kon sa diin may masimhutan nga pagkaon. Samtang, sige naman ang paglikaw sa iya sang duha ka kandidato. Sang ulihi ginsapak na lang siya sang sulat kag malip-ot nga tawag sa telepono ni Obama kag pila ka minutos nga pagpakigkita ni McCain. Sa Nobyembre pa ang eleksyon presidensyal sa US, pero subong pa lamang nagadilap na si Arroyo sa buli sang mga pangunahon nga kandidato didto para makasiguro

siya sang suporta sang sin-o man nga magadag sa ila. Naga-laum si Arroyo nga pagasup-ortahan sang



**Mga tampok sa isyu nga ini...**

**17 armas nakumpiska  
sg BHB sa mga reyd**  
PAHINA 5

**Kampanya nga  
literasiya sa tunga sg  
gera**  
PAHINA 7

**Ikatlong asembliya  
sg ILPS, ginhilwat**  
PAHINA 11

mga ini ang iya pagkapyot sa poder lampas pa sa 2010.


Samtang nagapanglugayawan kag nagapatuyang sang manggad sang banwa sa US, ginahalitan sang bagyo “Frank” ang milyun-milyon nga pumuluyo kag lubos kapintas nga nagahanot ang krisis sa ekonomya. Wala siya sang balatyagon sa mabaskog kag malaparan nga saway sang pumuluyo sa gingasto nga masobra \$1.5 milyon (katumbas sang P65 milyon) sa byahe. Bitbit niya ang iya bilog nga pamilya—mga anak, umagad, apo kag yaya nila, kag masobra 70 ka tinawo—10 sekretaryo sang kabinete, 59 kongresista, isa ka senador, upod ang mga asawa nila kag madamu pa nga mga alalay. Wala sang hawid nga nagpatuyang sila sa mga malahalón nga hotel, restoran, eksklusibo nga *jet* kag malahalón nga kotse nga de-tsUPER. Nag-arkila pa sanday Arroyo sang mahal nga *public relations* agud magpatahum sang imahen samtang didto sila.

Plano pa tani ni Arroyo mismo nga mag-upod sa mga tinawo niya tubtub sa Las Vegas, Nevada para maglantaw didto sang boksing kon waay lang mapunggan sang nauna nga nagaulan nga mga pagpakamaut.

Agud daw siya gihapon may balatyagon kag may ginahimo siya para sa mga biktima sang bagyo kag pagkalugdang sang barko, kuno abi siya gihapon ang nagadumala sa hilikuton *relief* paagi sa pagpakigpulong sa iya mga tinawo paagi sa telepono. Nagpostura pa siya sa atubang sang masmidya sang pang-akigan niya ang iya mga manubo nga upisyal.

Ang mga ini lunsay mga pakuno-kuno na lamang ni Gloria Arroyo agud tabunan ang kamatuoran nga siya lubos nga papet sang imperyalismong US kag puno sang anomalya, kahambugan kag kagarukan. Kitaon gid sang bilog nga banwa nga wala siya sang iban nga interes kundi ang magsunud-sunod sa imperyalistang amo, pat-uron ang suporta sini sa iya, magpatuyang sa dugos sang pagpanghimulos nila sa banwa kag padayon nga lupigon ang pumuluyo, samtang lubos kapintas nga wala kabalaka kag nagapalala pa sa pagkalisod kag pag-antos sang pumuluyong Pilipino.

## Arroyo, ginsug-alaw sang protesta sa US



Ginpangunahan sang lain-lain nga organisasyon sa idalum sang Bagong Alyansang Makabayan-USA (BAYAN-USA) ang mga akyon-protesta sang mag-abot si Arroyo sa US sadtong Hunyo 20. Nagpiket ang mga migrante nga Pilipino sa mga syudad kag lugar nga ginbisitahan ni Arroyo, lakip na ang Washington DC kag New York City.

Ginpakita sang mga Fil-Am ang ila kaakig sa korapsyon sang rehimeng Arroyo, paglapas sa tawha-nong-kinamatarung kag presensya sang militar sang US sa Pilipinas. Ginpamatukan nila ang pagpamuno ni Arroyo kag ginabasol sa iya ang padayon nga pagpaantus sang mga pamilya nga nabilin sa Pilipinas.

Ginpakamalaut nila ang ayuda militar nga ginhatag sang US sa rehimeng Arroyo nga ginagamit sa kampanya sang pagpamigos—mga pagpatay, pagdukot kag ilegal nga pag-aresto sa iya mga kritiko para mapabilin ang kaugalingon sa poder.

Ginpakamalaut man sang BAYAN-USA ang pagkapabaya ni Arroyo sa pagpanghalit sang bagyo nga “Frank” sa pungsod. Mas gin-una pa kuno ni Arroyo nga magpamasyar sa US kag magbakasyon samtang ginatós ka libo nga pumuluyo ang ginahalitan sa Western Visayas kag nag-abot na sa 500 ang napatay sa paglugdang sang MV Princess of the Stars malapit sa isla sang Romblon.



Tuig XXXIX Blg. 13 Hulyo 7, 2008

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

[www.philippinerevolution.net](http://www.philippinerevolution.net)

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: [angbayan@yahoo.com](mailto:angbayan@yahoo.com)

### Kaundan Editorial

Arroyo-tuta na, wala baltayagon pa	1
Protesta sa pagbisita sa US	2
Pagpasilabot sg US	3
Suporta ni Obama kay Arroyo	3
PKP, BHB kag bagyo “Frank”	4
<b>Madinalag-on nga TO</b>	5
Kampanya nga literasiya	7
RCTU, magapasaka sg kaso	8
Kontra OceanaGold	9
Pagpamatuk kontra-mina	10
Ika-3 asembleya sg ILPS	11
<b>Pagpanghalit sg estado</b>	12
<b>Balita</b>	13

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

# Kalamidad, ginahingalitan sang US agud makapasilabot

**L**iwat naman nga ginbangdanan sang imperyalismong US ang halit nga *dulot* sang bagyo sa Pilipinas agud labi pa nga makapasilabot sa teritoryo sang pungsod. Sa mandu ni Pres. George W. Bush sang US, nag-sulod sa kadagatan sang Pilipinas sining Hunyo 26 ang USS Ronald Reagan, isa ka barko-de-gera nga may armas nukleyar. Magadul-ong kuno ini sang *relief goods* sa mga ginhalitan sang bagyo sa Panay.

Bug-os nga ginbaton ni Gloria Arroyo ang pagsulod sang barko nga US, bagay nga lapas sa kaugalingon nga konstitusyon nga nagabawal sa pagsulod sang anuman nga armas nukleyar sa pungsod. Luwas sa idu-idu nila nga si Arroyo, wala sang nagapati sa pahayag ni US Ambassador Kristie Kenny nga wala sang dala nga armas nukleyar ang USS Ronald Reagan.

Suno man kay Sen. Rodolfo Biazon, anay AFP *chief of staff*, wala man sang mahimo ang isa ka barko pangkombat pareho sang USS Ronald Reagan sa pagsalbar sa masobra 800 pasahero sang MV Princess of the Stars nga nagkulob sadtong kabaskugon sang bagyo. Indi man nagakasanto ang mga F-18 *fighter plane* nga lulan sang barko-de-gera

sang US para magdul-ong sang *relief goods*.

Daan na nga gawi sang US nga ginaron ang mga aksidente para makasulod sa lugar sang Pilipinas, labi na kon sa diin may nagahulag nga mga rebolusyonaryong pwersa. Nagpadala ini sang mga suldado sa St. Bernard, Southern Leyte sang Pebrero 2006 sang mahalitan ini sang pagtiphag sang lupa. Antes ini, nagpadala man ang US sang mga tropang Amerikano sa Quezon kag Aurora sadtong 2004 sa mga lugar

nga nabiktima man sang bagyo, ba-ha kag pagtiphag sang lupa.

Katuyuan sang US sa pagpadala sang kuno mga *humanitarian mission* sa amo nga mga lugar ang paghanda para sa dugang pa nga interbensyon militar, lakip ang pamilyarisasyon sa lugar, paniktik, saywar kag iban pa nga tuso kag kontra-rebolusyonaryo nga tuyo. Siling ni Prof. Jose Ma. Sison, tagapangulo sang International League of Peoples' Struggle, kon matuod nga buhat sang kaluoy lang ang katuyuan sang US, ang dapat sini nga ipadala amo ang American Red Cross imbes nga mga tropa pangkombat. **AB**



## Pagsuporta ni Obama kay Arroyo, ginpakamalaut

**G**inpakamalaut sang Partido Komunista sang Pilipinas (PKP) si Sen. Barack Obama, kandidato sang Democratic Party sa pagkapangulo sang US bangud sa pagsuporta niya sa Balikatan *exercises* kag pagpasilabot militar sang US sa Pilipinas. Siling sang PKP, ang pahayag nga ini ni Obama nagapamatuod lang nga sin-o man ang mangin kabaylo ni Bush bilang pangulo sang US wala sang sarang malauman nga esensyal

nga pagbag-o sa polisiya kag pagtratar sang US sa Pilipinas.

Suno sa PKP, temprano pa lang ginapakita na ni Obama nga wala siya sang kinalain kay George W. Bush kag mangin sa kapareho niya nga kandidato si Sen. John McCain

sang nagapamuno nga Republican Party kaangut sang pagkontrol kag pagpasilabot-militar sang US sa mga malakolonya pareho sang Pilipinas.

Sa ginapahayag nga suporta ni Obama sa Balikatan, lubos nga gin-

abalewala niya ang mga terorista nga kahayuopan sang rehimeng US-Arroyo kag maduguon nga rekord sini sang mga paglapas sa tawhanong-kinamatarung sa ngalan sang "gera kontra sa terorismo" sang US.

Siling sang PKP, sa pamaagi sang Balikatan kag sang paghatag sang US sang pondo sa AFP, ginasakdag sang US ang pasistang kontra-rebolusyonaryo nga gera sa Pilipinas. Ginasuportahan sang US ang papet nga estado sa Pilipinas sa pagpasingki sini sang inaway kontra sa pumuluyo nga nagaduso nga tapuson na ang imperyalista nga dominasyon kag pagpasilabot sang US. **AB**

# BHB kag PKP, magabulig sa mga biktima sang bagyo "Frank"

**N**agpanawagan ang Partido Komunista sang Pilipinas sa tanan nga mga rebolusyonaryong pwersa nga ginapamunuan sini nga himuon ang tanan nga posible nga paagi para mabuligan ang mga nahalitan, napilasan kag napatyan dulot sang bagyo "Frank." Ginmanduan sini ang mga yunit sang Bag-ong Hangaway sang Banwa (BHB), ilabi na sa Eastern Samar kag Panay, nga maglunsar sang "*rescue, relief and rehabilitation*".

Ginhanot sang bagyo "Frank" ang pungsod sadtong Hunyo 21 at 22 kag ginhalitan sini ang 4,000 barangay, 366 banwa, 37 syudad, 48 prubinsya kag 15 sa 16 nga rehiyon. Pag-abot sang Hunyo 28, may nalista nga 540 katawo nga napatay, 41 nadula (luwas pa sa masobra 800 pasahero kag tripulante sang nagkulob nga MV Princess of the Stars) kag 175 napilasan. Halos apat ka milyon nga pumuluyo man ang naapektuhan, nga kadam-an nga nadulaan sang mga puluy-an sa Western Visayas kag Eastern Visayas. Ginabanta nga nag-abot sa P12 bilyon ang nasamad nga mga propyedad, agrikultura kag imprastruktura.

Sa atubang sang makahalanusbo nga kahimtangan nga ini, nagpaabot sang pagpakig-unong ang PKP sa milyon-milyon nga pumuluyo nga nabiktima sang bagyo. Kadam-an sa mga nahalitan amo ang mangunguma, mangingisda kag ordinaryo nga pumuluyo nga bulnerable sa mga kahalitan dulot sang mga bagyo kag iban pa nga kalamidad bunga sang ila kaimulon, pagpabaya sang gubyerno kag wala paghatag importansya sa kapalibutan.

Ang ugat sang malaparan nga kalamidad nga ini amo ang dinekada na nga lapnagon nga komersyal nga pagmina kag pagpang-utod sang kahoy. Partikular sa Panay, daku ang gindulot nga kahalitan sang paghawan sini sa nagtaliwan nga mga tuig sang nabilin pa nga

kagulangan agud matamnan sang *hybrid* nga mais. Nagbunga ini sang mga malaparan kag hinali nga pagbaha pareho sa natabo sa Western Visayas, kon sa diin naglunod sa tubig ang halos bug-os nga isla sang Panay. Indi man magnubo sa 400 nga pagtiphag sang duta ang nareport sa isla.

Dapat manabat ang rehimeng US-Arroyo sa pagkaguba sang kapalibutan bunga sang polisiya sini sang lapnagon nga pagmina, pagpangtroso kag pagkambyo sang kagulangan kag kadutaan agrikultural pakadto plantasyon sang tanum nga pang-eksport. Ginpakamalaut man sang PKP ang mga tag-iya sang Sulpicio Lines nga amo ang responsable sa paglugdang sang MV Princess of the Stars sa kadagatan sang Romblon sadtong Hunyo 22 bangud ginpahanugutan sini nga maglayag ang barko.

**Unilateral nga untat-linupok sa Panay.** Sa Panay, nagdeklarar man sang unilateral nga untat-lupok ang pangrehiyon nga pamunuan sang Partido sa isla agud magti-gayon sang *relief and rehabilitation* ang mga pwersa sini, lakip ang mga yunit ng BHB. Suno kay Ka Concha Araneta, tagapamaba ng Partido sa isla, igapatuman ang direktiba nga ini sa sulod kag guwa sang sonang gerilya sa apat ka prubinsya

sang Panay tubtub Hulyo 8. Bukas nga palawigon pa ang untat-linupok base sa pagtasa sang pangrehiyon nga liderato sang Partido bangud sa Visayas, ang Panay amo ang pinakamabaskog nga nahalitan sang bagyo "Frank."

Bisan pa man, wala magdeklarar sang untat-lupok ang pamunuan sang 3rd Infantry Division sang Philippine Army nga nakahedkwarters sa Jamindan, Capiz. Siling ni Brig. Gen. Nestor Ochoa, hepe sang 3rd ID, ang pangunahon nga katungdanan nila amo ang *internal security operations* (ISO). Padayon ang ila paglunsar sang operasyon militar bisan pa ginmanduan na kuno nga magbulig ang mga tropa nila sa mga ginhalitan sang bagyo.

Nagpaandam ang tagapamaba sang Partido sa Panay nga magapalupok man sang ila mga armas ang mga Pulang hangaway kon sila pagatakehon sang mga suldado sang gubyerno, mga pulis, mga paramilitar kag elemento sang bandido nga Revolutionary Proletarian Army-Alex Boncayao Brigade (RPA-ABB).

**Arroyo, gin-ulan sang pagpakamalaut.** Samtang, gin-ulan sang pagpakamalaut si Gloria Arroyo bangud sa iya hayag nga pagpatumbaya kag pagbale-wala sa mga nahalitan sang bagyo. Nagtulak ang peke nga pangulo sadtong Hunyo 20 pakadto sa US sa pihak sang nagahana nga paghanot sang bagyo "Frank" kag wala niya gin-utod ang 10-adlaw nga panglugayawan didto upod ang masobra 70 tinawo niya bisan nakaa-bot na sa iya ang mga report sang



malaparan nga kahalitan.

Mabaskog nga pagpakamalaut man ang ginbaton nanday Arroyo halin sa mga lider sang simbahan Katoliko, lakip sanday Archbishop Angel Lagdameo, presidente sang Catholic Bishops' Conference of the Philippines; Archbishop Oscar Cruz; kag Cardinal Gaudencio Rosales. Partikular nila nga gin-atake ang mga tinawo ni Arroyo nga nagkaladasma nga maglantaw sang boksing ni Manny Pacquiao sa Las Vegas, Nevada sangsa mag-uli sa Pilipinas agud buligan ang mga biktima sang bagyo "Frank."

Pag-abot ni Arroyo sa Pilipinas sadtong Hulyo 1 wala siya sang iban nga ginhimo kundi mandu diri-mandu didto kag ang pangpubliko nga pagkastigo sa iya mga tinawo para matabunan ang kaugalingon nga pagpatumbaya. Bistado nga nga pagpahamot lamang ini. Sa Panay, kon sa diin pinakambaskog ang nangin kahalitan, ginpauntat ni Chief of Staff Alexander Yano ang paggamit sang mga helikopter sang militar para sa nakatalana nga *relief and rehabilitation operations* sang Philippine Army sa nabagatnang Iloilo sadtong Hunyo 28 bangud wala pa kuno mag-abot ang mga *very important person* (VIP)—buot hambalon wala pa si Arroyo. Ini bisan masobra isa ka simana nga wala sang nahatag nga bulig ang nasyunal nga pamunuan sa isla.

Samtang, ginsug-alaw si Arroyo sang protesta sang ginatus-gatos nga mga residente sang banwa sang España, isla sang Sibuyan sa Romblon, sang magbisita siya sa prubinsya sadtong Hulyo 1. Ginpakamalaut sang mga residente ang pagmina nga ginatumod nila nga kabangdanan sang mga baha halin sa Mt. Guiting-Guiting. Ginabangan sang mga pulis ang martsa sang mga residente para indi makaabot sa ginahamtangan ni Arroyo.

AB



## 17 armas, nakumpiska sang BHB sa mga reyds

**N**apulo'g pito ka armas ang nakumpiska sang mga gerilya sang Bag-ong Hangaway sang Banwa (BHB) sa apa ka separado nga reyds sa Surigao del Norte, Davao Oriental kag Compostela Valley sining Hunyo 28 kag Hulyo 3.

Sa Davao Oriental, anum ka riple nga M16, duha ka 9mm nga pistola kag isa ka .22 kal. rebolber ang naagaw sang BHB sang salakayon sini ang istasyon sang pulis sa banwa sang Banay-Banay, Davao Oriental mga alas-9 sang aga sining Hulyo 3. Dala ang mga plakard nga may kontra-gubyerno nga mga islogan, daw nagdemonstrasyon nga mga mangunguma ang mga pwersang gerilya sa atubang sang munisipyo sang Banay-Banay. Madasig nga nakontrol sang BHB ang istasyon sa pihak sang pagbato sang mga pulis nga ara sadto.

Nauna sini, dungan nga ginsalakay sang mga pwersang gerilya sang BHB sadtong aga man sang Hulyo 3 ang duha ka *mining tunnel* sa Diwalwal, Compostela Valley—ang Azarez kag JB Management Corp. Gindisarmahan sang BHB ang mga pulis nga nagabantay sa nasambit nga mga *tunnel*.

Sa Surigao del Norte, indi magnubo sa walo ka armas ang nakumpiska sang BHB sang halos dulungan nila nga salakayon ang mga istasyon sang pulis sa mga banwa sang General Luna kag Dapa sa Siargao Island sadtong Hunyo 28, alas-10:30 sang gab-i.

Ang una nga pagsalakay gintigayon sang BHB sa General Luna.



Sakay sang mga *pump boat* ang mga nagsalakay sa istasyon sang pulis. Nakontrol sang BHB ang istasyon kag napilasan diri ang isa ka nagabato nga pulis.

Pagkatapos sini, sinalakay sang BHB ang banwa sang Dapa, mga 15 minutos ang kalayuon sa banwa sang General Luna. Diri isa pa ka yunit sang BHB nga sakay sang tatlo ka *van* ang nagsimpon sa nauna nga sumalakay. Nakontrol sang mga pwersang gerilya ang istasyon sang pulisya kag napasurrender ang anum ka pulis. Nakumpiska diri sang BHB ang tatlo ka M16, apat nga .45 kal. pistola, isa ka 9 mm nga pistola, mga bala kag uniporme.

Antes sila maghalin, ginpasa-ka sang mga pwersang gerilya ang bandera sang Partido Komunista sang Pilipinas sa *flagpole* sang munisipyo kag nanagtag sila sang mga rebolusyonaryo nga balasahon sa istasyon sang pulisya sa banwa sang Dapa.

Masunod nga adlaw, ginambus sang mga Pulang hangaway sa banwa sang Claver sa *mainland* sang Surigao del Norte ang nag-responder nga mga elemento sang Regional Mobile Group. Napatay sa ambus ang duha ka pulis, lakip si P/Chief Insp. Ricky Arado. Duha pa ka elemento sang 30th IB ang napatay sang makaengkentro sang BHB ang mga nagalagas sa ila nga pwersa sang AFP. Baliskad sa ginapalapta sang AFP nga nag-abot sa 18 gerilya ang napatay sa mga operasyon nga paglagas sini, nakaatras ang mga gerilya nga wala bisan isa ka kaswalti.

AB



## Taktikal nga opensiba sa Negros batuk sa pagmina kag eko-turismo

Isa ka wala sang lupok nga reyd ang ginlunsar sang Bag-ong Hangaway sang Banwa (BHB) sa Maricalum Eco-Port sa Barangay Maricalum, Sipalay City sadtong Hunyo 8, mga alas-8:30 sang aga. Nakumpiska halin sa mga gwardya ang isa ka *shotgun*, isa ka .38 kal. rebolber, isa ka radyo nga VHF kag iban pa nga kagamitan.

Ang reyd pagsuporta sang BHB sa pagbato sang pumuluyo sa nagahana nga pagsulod sa lugar sang apat ka korporasyon sa mina—ang Philex, Colet, Maricalum kag Vulcan—kag paggamit sang baybayon dagat diri para sa proyektong eko-turismo.

Bunga sang proyektong eko-turismo, ginatantya nga ginatos tub-tub linibo ka pamilya nga nagapuyo sa baybayon ang mabiktima sang dislokasyon.


Pagadumilian nga mangisda ang imol nga mangingisda kag masamad ang mga ulumhan. Indi lang mga mangingisda sa Maricalum ang apektado sang pagdumili kundi mga mangingisda sa mga barangay Cayhagan, Talacagay, Nauhang, Nabulao, 4 kag 5 sang Sipalay City.

Ginakabalak-an man ang labi nga paglapnag sang prostitusyon bunga sang eko-turismo. Sa subong bantog na ang Sipalay sa lapnagon nga prostitusyon bunga sang mga proyekto pang-eko-turismo sang rehimeng Arroyo kag sang lokal nga gubyerno. Mismo si Gloria Arroyo ang nag-endorso sang eko-turismo sa Sipalay sang magbisita siya diri kag nag-*scuba diving* sadtong Mayo 21.

Samtang, ang mga baybayon nga ini, lakip sang mga mabulubukid nga barangay maapektuhan sang hilo halin sa mga minahan. Mabiktima man sang dislokasyon ang mga nagapuyo sa mga interyor nga baryo nga apektado sang mga

operasyon sang mga minahan.

Agud tapnaon ang mga pumuluyo nga nagapamatuk sa mga proyektong eko-turismo kag minahan, gindes-



tino ang 302nd Bde, 61st IB, PNP Regional Mobile Group kag 6th Special Forces sa erna nga nagasakup sa Sipalay (ang Southwestern Negros nga ginalakipan sang Candoni, Hinobaan, Ilog, Cauayan, Kabankalan kag Sipalay). Mas mabangis ang mga yunit militar nga ini sa idalum sang Oplan Bantay Laya 2 batuk sa pumuluyo kag rebolusyonaryong kahublagan nga nagapanguna sa mga kampanya batuk sa mga kontra-pumuluyo nga programa sang rehimeng Arroyo.

AB

## Reyd sa Dapa, Surigao del Norte, isa ka aksyon nga pagpina—BHB

Ang reyd sang Bag-ong Hangaway sang Banwa sa istasyon sang PNP sa Dapa, Surigao del Norte amo ang aksyon nga pagpina sa pulisya kag despotiko nga meyor sang Dapa nga si Peter Boy Ruaya bangud sa ila mga kasalanan sa banwa. Ginhilera sang BHB-Surigao del Norte ang masunod nga mga krimen nila Ruaya kag iya mga pulis:

- pag-agaw sa 160 ektaryas nga duta halin sa imol nga pumuluyo;

- pagnegosyo sang mga ilegal nga droga pareho sang *shabu*;

- pagpadalagan sang mga ilegal nga sugal pareho sang Swertres kag iban pa;

- pakusog nga pagpalayas kag pangilkil sa mga magagmay nga manugbaligya gamit ang mga pulis;

- pagpamigos sa pila ka ne-

gosyante;

- pagmentinar sang mga armado nga kriminal nga *goons* nga nasentensyahan na sa kaso sang pagpatay pareho kanday Yayong Dulguime kag Eming Langres;

- Pagpalayas sa mga empleyado nga wala sang bastante nga basehan kag pagpasulod sa ila kabaylo sang malapit nga abyan.

Siling sang BHB-Surigao del Norte, ang taktikal nga opensiba sa Dapa amo ang mabaskog nga paandam sa mga malain nga elemento kag mga abusado nga upisyal sang gubyerno pareho ni Ruaya nga nagasabwag sang terorismo sa pumuluyo. Siling sini, ang BHB, nga siya ang tunay nga mga sulda do sang pumuluyo, magalunsar pa sang mga taktikal nga opensiba para pangapinan ang interes sang malapad nga pumuluyo.

AB

# Kampanya nga literasiya sa tunga sang gera

Isa ka kampanya sang literasiya kag numerasiya ang ginatigayon sa isa ka prenteng gerilya sa Southern Tagalog. Ginalunsar ini agud hatagan ang mga Pulang hangaway sang sandigan nga kinahanglanon nga magbasa, magsulat kag magkwenta, sandigan nga kinahanglanon para sa paghangup kag paghakos sang mas malawig nga teoritikal nga pagtuon kag iban pa nga intelektwal nga kinaalam.

Pareho sang kaso sa kadam-an nga mga yunit sang BHB, mayorya sang mga hangaway sa prente nga ini naghalin sa pinakanubo nga saray sang sahing mangunguma, ang imol nga mangunguma. Pila lamang sa ila ang nakatapos sang elementarya. Ang iban wala man lang nakatungtong sang eskwelahan gani indi makahibalo magbasa ukon magkwenta.

Bisan pa man, sa bulig sang rebolusyonaryong kahublagan, lubos nila nga nahangpan ang ugat sang ila kaimulon. Determinado sila nga pas-anon ang mga rebolusyonaryo nga katungdanan agud dulaon ang pagpamigos kag tapuson ang mapanghimulos nga sistema. Pero bangud sa ila limitasyon sa pagbasa, nalimitahan man ang ila ikasarang sa pagtungod sang lain-lain nga hilikuton sa pagpabaskog sang hangaway, pag-organisa kag pagpahulag sa masa.

Isa ka programa pangliterasiya kag numerasiya ang ginhimo sang pamunuan sang platun agud atubangon ang sitwasyon nga ini. Katuyuan sini nga tudluan magbasa, magsulat kag magkwenta ang mga hangaway, kag sa proseso mapauswag sila, mabilog ang pagsalig sa kaugalingon kag mapabaskog ang ikasarang sa hilikuton edukasyon kag propaganda.

Ginsuguran ini paagi sa isa ka sentralisado nga pagtuon. Natumod diri ang walo nga tumuluon nga gintunga sa duha ka lebel. Ang mga tumuluon sa una nga lebel


amo ang wala nakatungtong sa eskwelahan. Ginalakipan ang ila programa sang pagkilala sang mga letra kag numero kag kon pano magbasa, magsulat kag magkwenta.

Ang mga tumuluon naman sa ikaduha nga lebel amo ang nakatungtong sa eskwelahan pero wala nakatapos. Makahibalo na magbasa, magsulat kag magkwenta ang mga ara sa lebel nga ini pero kinahanglan pa nga mahanas. Ginatudluan man sila sang husto nga pagpanigbato sa mga tinaga.

Nangin malahalon nga balasahon nila ang mga isyu sang *Ang Bayan* kag iban pa nga rebolusyonaryo nga balasahon. Ang mga nangin instruktur diri amo ang mga kaupod man nga mas mataas ang lebel nga nalab-ot sa eskwelahan nga burges. Nakatapos sa hayskul ang mga instruktur kag may ara man nga nakatungtong sa kolehiyo.

Sa panugod, wala man nabudlayan ang mga kaupod nga kumbinsihon ang mga kulang sa literasiya kag numerasiya agud magtuon. Pero may pila nga mga tumuluon, ilabi na ang sa una nga lebel, ang naluyahan na sang mag-atubang sa mga kabudlayan sa pagtuon. Wala sila naanad nga mag-uyat sang lapis kag bolpen. May pila man ang nagahambal nga nagasakit ang ulo sa pag-isip kag kabisar. Sa sini nga kahigayunan, may isa-isa nga pagtutok kag pagkumbinse sa mga kaupod nga nabudlayan.

Bangud bag-o sa sini nga hili-



kuton, nabudlayan man ang mga instruktur sa proseso sang pagtuon. Nangin pleksible sila sa pagbalay sang programa base sa kinahanglanon sang mga tumuluon kag kon ano ang santo sa ila hilikuton pangpulitika sa matag-adlaw. Ang mga leksyon ginapraktika sa matag-adlaw nga hilikuton sang mga kaupod, pareho halimbawa sang pagkwenta sang pinansya sang yunit ukon paghimo sang report bahin sa hulag sang kaaway. May ara man nga talakayan ang mga kaupod para sa mga pagtulun-an. Naghimo man sang *lesson plan* ang mga instruktur.

Adlaw-adlaw ang pagtuon—ang una nga lebel amo sa aga kag ang ikaduha naman amo sa hapon. Nagaabot sang tatlo tubtub apat ka oras ang kada sesyon. Antes matapos ang klase, nagahatag sang takda nga pagtulun-an ang mga instruktur. Ginasabat ini sa klase masunod nga adlaw. May ara man sang pagrepaso pagkatapos sang isa ka leksyon agud matantya ang natun-an sang mga tumuluon. May malip-ot kag may malaba nga eksaminasyon.

Kada tumuluon may probisyon sang mga gamit sa pagtuon pareho

sang papel, notbuk, lapis kag bolpen. Nagagamit man sang A-Ba-Ka-Da kag *flash card* ang ara sa una nga lebel. May tig-isa ka ka pisara man ang mga tumuluon agud hanasan bisan wala sa eskwelahan.


Ang mga kaupod nga indi upod sa pagtuon nahatagan man sang katungdanan. Sila ang nagabulig sa paghimo sang mga biswal kag takda nga pagtulunan sang mga tumuluon. Nagahatag sila sang adbays sa mga tumuluon kon nagaatubang sa pi-la ka problema sa pagtuon.

Pagkatapos sang isa ka bulan liwat nagdispers ang yunit sa lain-lain nga baryo para sa hilikuton pangmasa. Bangud sa indi na mahimo ang regular nga sentralisado nga pagtuon sa literasiya-numerasiya, ginbalay sang yunit ang programa para mapadayon gihapon ang pagtuon paagi sa isa-isa nga pagtudlo. Nagtalana ang yunit sang mga kaupod nga magatum-ok sa mga nagatuon sa kada nila pormasyon. Ginahimo ini kon may bakante nga oras samtang nagatungod sang pangunahon nga katungdanan. Gani nagapadayon gihapon ang pagtuon sang mga Pulang hangaway.

Pareho sa madamo nga iban pa nga prenteng gerilya sa bilog nga pungsod, ginaplano sang platun ang pagpalapnag sang literasiya sa kubay sang masa nga ginaorganisa nga madugay na nga gindingutan sang estado sang kinamatarung sa edukasyon. Sa eksperensya nga ini, ginpakita nga indi lamang sa syensya sang pagpakig-away nagatuon ang mga kaupod. Ginapataas nila ang kamuklatan sang tanan nga Pulang hangaway agud labi nga makaalagad sa pagpasulong sang rebolusyonaryo nga paghimakas sang pumuluyo. **AB**

## RCTU, magapasaka sang kaso sa Hukmanan sang Pumuluyo

**M**agapasaka ang Revolutionary Council of Trade Unions (RCTU) sa Southern Mindanao Region (SMR) sang kaso sang pagpanabotahe sa



kabuhian, paglapas sa tawhanong-kinamatarung kag iban pa nga makasilig-ni nga krimen sa Rebolusyonaryong Hukmanan sang Pumuluyo batuk sa maneydsment sang Stanfilco-Dole Phils., Franklin Baker Inc., Lapanday Development Corp. (LADECO) kag Davao City Water District (DCWD).

Masunod ang mga tampok nga paglapas sa tawhanong-kinamatarung sang mga mamumugon sa Southern Mindanao sa sulod sang nakaligad nga napulo ka bulan:

**Septyembre 2007.** Iligal nga ginsipa sa trabaho sang Stanfilco-Dole Phils. ang 250 mamumugon sini sa DITFI. Ang DITFI subsidyaryo sang Stanfilco nga nagahakot sang produkto nila nga saging kag pinya. Ginbayluhan ang mga regular nga mamumugon sang mga kontraktwal. Gingamit sang Stanfilco-Dole Phils. ang mga mersenaryo nga pwersa sang 10th ID kag mga elemento sang anti-komunista nga National Alliance for Democracy (NAD) agud bungkagon ang piketlayn sang mga nagaprotesta nga mamumugon. Kilala ang Stanfilco-Dole Phils. sa lapnagon nga pagpahalin sang regular nga mamumugon kag pagabuslan sang mga kontraktwal.

**Enero 2008.** Ginpahalin ang 242 regular nga mamumugon sang Franklin Baker Inc., isa ka korporasyon nga Amerikano nga nagaproseso sang ginaeksport nga *dessicated coconut* ukon ginpamala nga unod sang niyog. Ginkontrata sa apat nga pabrika sa guwa ang trabaho sang mga ginpahalin. Madugon ang rekord sang Franklin Baker Inc. Sadtong dekada 1980, duha ka nagawelga nga mamumugon ang napatay sang mapintas nga ginbungkag ang ila piketlayn.

**Marso 2008.** Bangud sa malig-on nga panindugan sang unyon batuk sa pribatisasyon sang Davao City Water District, ginapahalin ang presidente kag duha pa ka upisyal sini kag sinus-pinder ang 38 pa ka upisyal kag myembro sang unyon. Sining nakaligad nga mga bulan, ginkuha man sa trabaho ang masobra 200 mamumugon sang LADECO, isa ka kumpanya nga nagaeksport sang saging nga ginatag-iyahan sang pamilya sang anay Secretary Cito Lorenzo sang Department of Agriculture.

Ginpanginbulahan sang RCTU-SMR ang Pulang Bagani Company sang Bag-ong Hangaway sang Banwa sang disarmahan sini ang mga pwersa pangseguridad sang LADECO sadtong Mayo 11. Madumduman nga sadtong tunga-tunga sang dekada 1980, lima ka mamumugon sa plantasyon sang LADECO ang ginpatatay sini sa mga armado nga tinawo sang anti-komunista nga NAD.

Ginabuyok sang RCTU-SMR ang tanan nga mga mamumugon nga biktima, pati sang mga pamilya kag mga unyon nga magsuporta sa ti-kang nga ini nga may katuyuan nga agumon ang tunay nga rebolusyonaryo nga hustisya. Nagapanawagan ang RCTU-SMR sa tanan nga mamumugon sa rehiyon nga palig-un-on ang kubay, maghimakas kag paslawon ang pagpanghalit sang imperyalismo, pyudalismo kag bu-rukrata kapitalismo. **AB**



# Kampanya kontra OceanaGold, nagamadinalag-on

**S**unud-sunod nga pagkapaslaw ang ginbaton sang OceanaGold Philippines Inc. sa atubang sang malig-on kag malaparan nga nga pagbato sang mga residente, mga aktibista pabor sa kapalibutan, tawong simbahan, mga patriyotiko nga pwersa kag malapad nga pumuluyo sa pagmini sa Didipio, Nueva Vizcaya sining Hunyo.

Daku nga bunal sa kumpanya ang halos magkadungan nga desisyon nga ginpagwa sang lokal nga guberno kag rehiyunal nga korte kag pahayag sang mga makabanwa nga kongresista batuk sa pagmina sini.

Sadtong Hunyo 19, ginpauntat sang rehiyunal nga korte ang pagdemolis sang mga kabalayan sa *mining site* samtang ginabista pa ang ila mga kaso. Sadtong Hunyo 25, nagpasar sang makasaysayan nga resolusyon ang guberno prubinsyal nga nagabawi sang ila suporta sa OceanaGold. May nakapasaka man nga resolusyon sa lokal nga guberno nga nagabawal sa anuman nga *open-pit mining* sa prubinsya. Antes sini, nagpagwa sang *cease and desist order* ang guberno prubinsyal batuk sa OceanaGold bangud sa wala sini pagbayad sang buhis nga nagabalor sang P28 milyon.

Nagmaniobra ang rehimeng Arroyo para baliskaron sang Court of Appeals ang mandu sang rehiyunal nga korte batuk sa OceanaGold. Nag-ani sang pagpakamalaut ang tiangkang nga ini sang rehimen ilabi na nga paliwat-liwat sini nga ginahatagan pahanugot ang OceanaGold nga padayunon ang mga operasyon sini sa pihak sang pagpamatuk sang pumuluyo didto.


Sa Kongreso, nagpasar sang resolusyon sadtong Hunyo 18 si Bayan Muna Rep. Teddy Casiño para imbestigahan ang mga iregularidad kag pagpang-abuso sang OceanaGold kag sang isa pa nga dumuluong nga kumpanya sa mina nga nag-opereyt

subong sa Nueva Vizcaya. Naghimo na ang mga kongresista sang pauna nga imbestigasyon sadtong Hunyo 7-8 sa mga barangay sang Didipio kag Kakidungen. Wala sila nalingkang bisan pa iligal sila nga gindite-ner sang mga bayaran nga pulis kag gwardya samtang pakadto sila sa *mining site*.

Sadtong Hunyo 24, napilitan na ang OceanaGold nga temporaryo nga suspendihon ang ila mga operasyon bangud kuno sa kakulangan sang pondo. Ginsuspinde man sini ang mga kaangot nga kontrata pangkonstruksyon sa lugar.

Napilitan nga mag-atras ang OceanaGold sa atubang sang tatlo ka magkasunod nga bulan sang magtibusok ang balor sang mga sapi sang kumpanya sa pangkalibutanon nga merkado makaligad mabuyagyag nga labi nga naatras ang proyekto sini sa Didipio. Nagaabot na sa US\$117 milyon ang nabuhos sang kumpanya para sa pauna nga eksplorasyon kag pag-areglo sa mga nagakaigo nga permit.

Ginhigop sang mga operasyon



sini sa Didipio ang kapital halin sa mga operasyon nga mina sini sa iban nga parte sang kalibutan. Base sa tuigan nga report sini, nag-abot sa US\$24.43 milyon ang napirde diri sadtong 2006 (sang magsugod ang operasyon sini sa Didipio) kag nagdaku pa pakadto US\$69.04 milyon sadtong 2007.

Samtang nagalapad kag nagalapnagon ang protesta batuk diri sa lokal, rehiyunal kag nasyunal nga lebel, nagasulod sa pinsar sang mga imbestor diri nga indi sustenable kag makadto lang sa pagkabangkrap ang proyekto.

**Pagpaniplang kag pagpamwersa.** Pila ka dekada na nga ginatuyo sang mga dumuluong nga imbestor nga makuha kag mapanginpulan ang manggaranon nga deposito sang saway kag *nickel* sa Didipio. Sadtong 1994, ginsuguran sang Climax-Aremco Mining Company (CAMC) ang pagdiskubre sang mga deposito sa idalum sang duta sang barangay. Ginhatag sang sadto rehimeng Ramos sa CAMC ang kinamatarung nga kutkuton ang 765-ektaryas nga kadutaan sa Didipio kag tuki-bon ang iban pa nga deposito sa 15,000 ektaryas nga duta nga naga-sakop sa 15 barangay sa palibot sang Didipio.

Pila ka beses na nga ginbayluhan sang CAMC ang ngalan sini sa tuyo nga tiplangon ang mga residente kag palagyuhan ang mga kaso kag petisyon nga nakaplastar batuk sa kumpanya.

Sadtong 2004, gintukod sang CAMC ang Australasian Philippines Mining Inc. (APMI) kag ginsaylo diri ang kinamatarung sa pagmina sa Didipio. Pero wala gihapon nasuguran ang pagmina sa lugar bangud napaslawan ang APMI nga makuha ang pagpasugot sa proyekto sang mga lokal nga konseho nga rekisito sadto sa anuman nga operasyon nga pagmina sa pungsod.

Nakuha sang OceanaGold sadtong 2006 halin sa CAMC ang kinamata-

rung sa pagmina sa Didipio. Sadtong tuig man nga ina, nakakuha ang OceanaGold sang A\$170 milyon (P7.3 bilyon sa bayluhanay nga A\$=P42) agud mapadayon ang proyekto. Ginbag-o ang ngalan sang APMI pakadto sa OceanaGold Philippines Inc. sadtong 2007.

Suportado sang mas daku nga pondo, ginsuguran sang OceanaGold ang mas agresibo kag madugon nga pagduso sa proyekto katuwang ang rehimeng Arroyo, sang militar kag lain-lain nga ahensya sang gubyrno. Sadtong Agosto 2006, nagpadala ang rehi-men sang mga suldado halin sa 5th ID kag *Regional Mobile Force* sang PNP agud magtigayon sang “road clearing operations” sa tunga sang Barangay Tubod kag Barangay Didipio. Ini bisan nakapasa pa sa korte ang mga reklamo kag kaso sang mga residente batuk sa kumpanya.

Sadtong Marso 2008, isa ka residente ang ginluthang sang mga gwardya sang OceanaGold samtang ginadepensahan niya ang isa ka kaingod balay batuk sa *demolition team* sang kumpanya. Naglunsar man ang kumpanya sang kampanya para pahugon kag ipiton ang mga lokal nga upisyal kag residente nga malig-on nga nagabato sa ila. Kabahin sini ang iligal nga pagditiner kag pagsakit sang mga upisyal sang PNP sa isa ka konsehal sang barangay.

Labi lamang nga nagsingki ang pagbato sang mga residente sang Didipio kag sang Nueva Vizcaya sa pangkabilugan. Makapila ka beses nila nga madinalagon nga napalayas ang mga kontraktor kag tim sang kumpanya. Bumuhos ang suporta halin sa sektor sang simbahan, mga organisasyon nga nagaamlig sa tawhanong-kinamatarung, internasyunal nga organisasyon kontra-mina, mga kongresista kag iban pa.

AB

## Nagalapad ang mga grupo nga nagapamatuk sa pagmina

**N**agadamo ang mga grupo nga nagapamatuk sa malaparan kag komersyal nga pagmina samtang nagainagaway ang dalagku nga dumuluong nga kumpanya nga ginaengganyo sang rehimeng US-Arroyo nga makamina sa pungsod. Nagaigting ang mga pagpamatuk sa pihak sang dalagku nga halit sa kabuhi, kagamitan kag kabuhian sang pumuluyo bu-nga sang mga halit nga tuga sang mga komersyal nga minahan sa mga talon.

Sadtong Hunyo 23 nagpaggwa sang gintingub nga resolusyon ang mga aktibista nga dumuluong kag lokal nga nagpahayag sang pagpamatuk sa *offshore mining* (pagmina sang langis sa kadagatan) sa pungsod kag nagpanawagan sa gubyrnong Arroyo nga untaton ang imperyalista nga mga aktibidad nga nagatuga sang pagkaguba sang kapalibutan. Nagpirma diri ang 339 nga mga aktibista nga progresibo kag nagapabor sa kapalibutan halin sa 26 ka pungsod. Ang pagpirma sang resolusyon gintuon sa Ikatlo nga Internasyunal nga Asembliya sang International League of Peoples’ Struggle (ILPS) nga ginhiwat sa Hongkong sadtong Hunyo 18.

Sa partikular, ginapamatukan sang grupo ang \$110-milyon eksplorasyon sang *gas* sa Ragay Gulf sa Bicol; sa mga prubinsya sang Guimaras kag Antique sa Western Visayas; Leyte; Davao del Sur; Surigao del Sur; kag Quezon kag Mindoro sa Southern Tagalog.

Sa Oktubre magapadala ang grupo sang isa ka *fact-finding mission* para imbestigahon ang epekto sang *offshore mining* sang Japan Petroleum exploration Corp. (JAPEX) sa *Tanon Strait* sa tunga sang Cebu kag Negros. Pangunahan ini sang Pilipinas, Japan, Australia kag Malaysia.


Kadungan sini nagpahayag man sng pagpamatuk ang Suara Bangsamoro

sa plano nga eksplorasyon sang langis sang Exxon Mobil Corporation sang US sa Sulu Sea. Disgustado sila kag nagakabalaka sang mahibalan nga ginhatagan na sang pahanugot sang gubyrnong Arroyo ang ExxonMobil nga makamina diri. Ginbuyagyag sang grupo nga ang eksplorasyon sang langis sa Sulu pamatuod nga madugay na nga nagagapangita sang mga deposito sang langis ang US sa Mindanao kag ginagamit nga pangtabon diri ang paglunsar sang mga pahanas-militar kag kuno isa ka *humanitarian mission*.

Ginatum-ukan man sang grupo nga hugot nila nga ginapamatukan ang eksplorasyon bangud indi lang kapalibutan ang maguba kundi ang kabuhian sang mga tawo sa lugar, nga kadam-an amo ang mangingisda.

Sadto pa nga Abril 2008 naglunsar na sang aksyon protesta ang mga mangingisda sa *Tanon Strait* kontra sa eksplorasyon sang langis sang JAPEX. Nagreklamo ang mga mangingisda sa banwa sang Aloguinsan, Cebu nga nabuhinan ang ila nga nakuha nga isda sang mag-umpisa ang proyekto sang JAPEX sadtong Mayo 2005. Humalin sa napulo ka kilo nga mahulik nga isda kada adlaw, subong tatlo ka kilo na lang ukon manubo pa ang makuha nila. Ginaatake nila ang gubyrnong Arroyo sa paghatag sini sang pahanugot sa pagmina sa isa ka lugar nga deklarado nga protektado nga erya.

AB



# Ikatlo nga asembliya sang ILPS, ginhiwat

**M**adinalag-on nga ginlunsar ang Ikatlong Internasyunal nga Asembliya sang International League of Peoples' Struggle (ILPS) sa Hong Kong sadtong Hunyo 18-20, 2008.

Nagtambong diri ang 265 delegado nga nagrepresentar sa 165 organisasyon halin sa 30 ka pungsod. Ang pagtipon nga may tema nga "Pasanyugon ang paghimakas sang mga pumuluyo, maghiliusa para tukuron ang bag-ong kalibutan kontra sa imperyalista nga agresyon, terorismo sang estado, pandarambong kag pagwasak sang katilingban."

Gindumdom, ginpasidunggan kag ginpasalamatan sang ILPS ang nagtaliwan nga lider-mamumugon nga Pilipino nga si Crispin "Ka Bel" Beltran, nga nagserbe nga tagapundar nga tsirman sang International Coordinating Committee (ICC) kag *honorary* nga tagapangulo sang ILPS. Gintumod ang iya amot sa kahublagan sang mamumugon, paghimakas para sa pungsudnon kag pangkatilingban nga kahilwayan kag pagpalig-on sang ILPS.

Sa iya nga report, gintumod ni Prof. Jose Ma. Sison, nagligad kag bag-ong nombrar nga puno sang ICC sang ILPS, ang mga naangkon nga kadalag-an sang pormasyon halin

sang matukod ini, ang mga nangin kahinaan sini kag ang mga hangkat kag gilayon nga katungdanan sini.


Bilang isa ka militante nga anti-imperyalista kag demokratiko nga pormasyon nga nagatalakay sa malapad nga isyu sang pumuluyo sa kalibutan, nangin aktibo ang ILPS sa mga paghimakas sang mga pumuluyo sa Asia, Africa ka Latin America. Nagpusisyon ini kag nagpanawagan sang pagpasingki sang paghimakas sang pumuluyo kontra sa mga imperyalista nga polisiya sang globalisasyon kag pangkalibutanon nga terorista nga gera. Ginpahayag sini ang panindugan sang pumuluyo sa krisis sang pangkalibutanon nga kapital, pandarambong sa kapalibutan, pagpabilin sang tropang Amerikano sa Iraq kag Afghanistan kag pagpanakop sini sa Palestine, pagpanghimulos kag pagpamigos sa pumuluyo sa kalibutan. Ginapakig-away sini ang nagkalain-lain nga porma sang diskriminasyon, kag mga imperyalista nga polisiya sang mga pungsod kontra sa mga

mamumugon, migrante kag kabataan.

Sa pamaagi sang *video-conference*, gintalakay ni Professor Sison halin sa The Netherlands, ang nagalala nga pangkalibutanon nga krisis sang kapitalista nga sistema kag ang nagalala nga pagpanghimulos sa mga pumuluyo. Gintumod niya ang malaparan nga disempleyo, pagbagsak sang sweldo, pagtaas sang presyo sang basehan nga kinahanglanon, malaparan nga gutom, malnutrisyon kag madasig nga paglala sang mga serbisyo nga pangkatilingban. Bunga sang tanan nga ini ang nagasingki nga pagpamatuk kag paghimakas sang pumuluyo. Kadungan sini, ginpakamalaus niya ang grabe nga pagpasibangud sang imperyalista nga US sa pang-atake sa US sadtong Sept. 11, 2001 sa paglunsar sini sang pangkalibutanon nga gera kontra-terorismo.

Ginhatagan pagtamod ni Professor Sison ang armado nga rebolusyonaryo nga paghimakas sa Iraq, Afghanistan, Columbia, Peru, Brazil, Nigeria, Pilipinas, Turkey, India kag iban pa nga pungsod sa South Asia. Nagpanawagan si Professor Sison nga labaw sa tanan, dapat nga magtukod sang mga rebolusyonaryo nga pwersa sa mga pungsod nga wala pa sini, kag palaparon ang mga ini sa mga pungsod nga may ara na. Dugang pa niya, sa ini lang nga pamaagi sang pagtinguha mabawi kag makabangon halin sa temporaryo nga pagkapaslaw ang proletaryo nga rebolusyon kag kahublagan nga anti-imperyalista sa kalibutan.

Sa katapusan sang pagtilipon, nag-isa ang ILPS nga paayuhon ang pagpukaw, pag-organisa kag pagpahulag sa milyon-milyon nga pumuluyo kag pasanyugon ang paghimakas sang mga pumuluyo para magom ang katilingban nga hilway, mauswagon kag may hustisya sosyal kag magluntad ang pangkalibutanon nga kalinungan. **AB**





# Utod ni Ka Parago, ginpatay; ginatos nagbakwit sa Eastern Samar

**W**ala untat ang kalakasan militar. Ginatos nga mangunguma ang napilitan nga magpalagyo halin sa ila mga baryo sa Eastern Samar bangud sa masingki nga militarisasyon. Ginpatay sang mga suldado ang sibilyan nga utod sang isa ka kumander sang BHB. Isa ka Pulang hangaway ang gindukot sa Negros Oriental. Sa Surigao City, anum na ka mamumugon ang basta na lang ginharas, gindakop kag ginpabakol sa militar. Pila lang ini sa pinakaulihi nga nareport nga mga paglapas sa tawhanong-kinamatarung nga nakalap sang *Ang Bayan*.

**Hulyo 5.** Gindukot sang mga militar ang mag-utod nga Rose Ann, kag Fatima Gumanoy, 17, suno sa report sang Karapatan. Anak sila sang ginpatay sang militar nga si Eddie Gumanoy, pinuno sang Kasama-Timog Katagalugan. Napilasan sadtong Abril si Rose Ann sang luthangon sang militar ang balay sang pamilya nga iya ginaduaw sa General Nakar, Quezon. Ginpasakaan siya sang kaso nga rebelyon sang militar pero nabuhian matapos magpyansa.

Suno sa iloy niya nga si Maria, nakatakda sila nga magkita nga mag-ilog sa Alabang pero wala na mag-abot ang mag-utod. Sa pina-kaulihi nila nga mensahe nga *text* sa ila iloy, ginsiling nila nga ginsundan sila, gindakup kag gindala sa Camp Aguinaldo. Madamu nga pagpamahug ang nabaton ni Rose Ann halin sang mahilway siya, siling sang iya iloy. Ginapagwa subong sang militar nga boluntad nga nagsurender si Rose Ann sa militar. Wala gihapon siya ginatugutan nga magbaton sang bisita.

**Hunyo 23.** Mas o menos 800 indibidwal ang nagpalagyo pakadto sa poblasyon sang General MacArthur, Eastern Samar bangud sa mga pagpang-abuso militar sa ila lugar sa kabukiran. Ang mga biktima lunsay mga residente sang anum nga barangay sang General MacArthur—Roxas, Alang-alang, San Isidro, Os-

mena, Tandang Sora kag Pinggan.

Suno sa mga biktima, lapnagon ang mga pagpang-abuso sa ila sang militar. Isa ka biktima nga lalaki ang gindakup sang kaagahon sang militar, ginpaidalum sa mabaskog nga tortyur kag gab-i na ginbuhian. Duha ka bata nga nagatinda sang saging ang ginsita sang militar kag ginsumbag sa tiyan.

**Hunyo 13.** Ginluthang kag ginpatay sang mga elemento sang 10th ID si Danilo Pitao, utod ni Leoncio “Ka Parago” Pitao nga kumander sang BHB. Suno sa pahayag sang Merardo Arce Command (MAC) sang BHB, ang pagpatay isa ka desperado nga tikang sang pasista nga hangaway sang reaksyunaryo nga rehimeng Arroyo. Si Danilo Pitao, 42, isa ka sibilyan nga nagatrabaho sa kapitolyo sang prubinsya sang Davao del Norte. Suno sa MAC, natumod na sini ang mga imbolbado kag utok sa pagpatay kag nangako ini nga hatagan sang hustisya si Pitao kag iban pa nga biktima sang mga pagpang-abuso sa tawhanong-kinamatarung. Pauli si Pitao sa iya balay sa Tagum City sakay sang traysikel sang luthangon siya sang mga nakamotorsiklo nga operatiba sang militar.

**Hunyo 12.** Gindukot sang mga elemento sang 79th IB sa Sityo Kabanusan, Barangay Dodbob, Valencia, Negros Oriental si Calixto “Ka Manong” Alfante, 46, isa ka Pu-

lang hangaway. Suno sa mga saksi, isahanon kag wala sang armas si Ka Manong sang dukuton siya sang mga militar. Ara sa Barangay Dodbob si Ka Manong agud magbulig sa mga mangunguma bahin sa ila problema sa pagpanguma.

**Mayo 14.** Anum ka mamumugon sang Surigao Water District (SWD) ang arbitrario nga ginaresto sang mga elemento sang 402nd Division Reconnaissance Coy sang AFP. Kinumpiska sang militar ang ila tatlo radyo nga VHF kag apat ka binangon. Pwersahan sila nga ginhimo nga giya sa mga operasyon militar. Pila ka mamumugon ang ginbakol sang mga suldado. Ginpiang sang aksyon nga ini sang militar ang serbisyo sang SWD sa pumuluyo sang Surigao City.

**Mayo tubtub subong.** Ginaharas sang mga elemento sang 503rd Infantry Battalion Reconnaissance Coy kag sang 502nd Composite Coy ang mga minorya nga Binongan sa Baay-Licuan, Abra bangud sa pagpamatuk nila sa pagmina sang Olympus Pacific Minerals, Inc. sa ila duta sang katigulangan. Awtomatikong nga ginaakusahan nga mga katapu sang PKP-BHB-NDF ang mga lider sang Baay-Licuan Takderan Ominu a Karbengan (Balitok) kag mga istap sang Cordillera Peoples’ Alliance (CPA) sa Abra (Kastan) nga nagabulig sa mga Binongan sa ila pagbato.

Tatlo ka balay sa Barangay Poblacion ang ginkampuhan sang militar. Kadungan sang pagpangharas ang surbeylans sa baryo. Ginkuhaan sang mga suldado sang bidyo ang mga pulong sang tagabaryo sadtong Mayo 29. Masunod nga adlaw, ginsuguran sang militar ang pag-

sensus sa barangay samtang ginakuhaan gihapon sang bidyo ang mga tagabaryo. Nagsensus ang militar sa Barangay Lenneng kag Ca-oayan. Halin Hunyo 1 nagpaskil ang militar sang listahan sang ginasiling sini nga mga terorista nga prente kon sa diin lakip ang CPA.

**Abril 10.** Ginpatay sang mga elemento sang 30th IB si Jelson Prikato, isa ka mangunguma sa Bagacay, Claver, Surigao del Norte. **AB**

## Kaso sang mga mamahayag batuk sa pulisya, ginbasura sang korte

**D**aku nga bunal sa kahilwayan sa pagpamahayag. Ini ang reaksiyon sang 36 nga mamahayag kag apat ka organisasyon sang masmidya nga nagpasaka sang kaso batuk sa pulisya kag mga upisyal sang gubyernong Arroyo nga nagmandu nga arestuhon ang mga reporter nga nagkoher sa pag-alsa batuk sa rehimeng Arroyo sang isa ka grupo sang militar sa pagpamuno nanday Sen. Antonio Trillanes IV kag Brig. Gen. Danilo Lim sadtong 2007. Siling ni Atty. Harry Roque, abugado sang mga mamahayag, daw lokal nga bersyon sang layi militar ang gusto paluntaron sang pagbasura sa kaso ni Judge Reynaldo Laigo sang Makati Regional Trial Court Branch 56. Siling niya, nagagwa diri nga ang pulisya ang may solo nga kinamatarung nga magdesisyon kon ano ang mahimo ikoher kag indi sang mga mamahayag. Ginalapakan sini indi lamang ang kinamatarung sang mga mamahayag kundi ang kinamatarung sang pumuluyo nga may iya impormasyon, suno man kay Ellen Tordesillas, kolumnista sang *Malaya*.

Sa amo pa man wala nalingkang ang mga tagamasmidya. Plano nila nga mag-apelar tubtub sa Korte Suprema kon kinahanglan kag magpasaka sang kaso sa UN International Committee for the Protection of Human Rights bangud isa ang Pilipinas sa mga nagpirma sa International Covenant on Civil and Political Rights. Bangud sini, siling ni Roque, obligasyon sang gubyernong Arroyo nga respetuhon ang tawhanong-kinamatarung kag kahilwayan sa pagpamahayag.

Nagpaandam man si Roque sa pulisya nga indi gamiton nga rason ang desisyon sang korte para arbitrario nga mang-aresto sang mga mamahayag. Siling niya, magapasaka man sila sang kontra-demanda nga *coercion* kag *serious illegal detention* kon amo ang matabo.

Madumduman nga gin-aresto ang mga mamahayag sa Manila Peninsula Hotel matapos ang pag-alsa, bangud nagsupak kuno ang mga tagamasmidya sa mandu sa ila nga halinan na ang hotel. Ginaakusahan man sang pulisya nga kahimbon sang mga nag-alsa nga militar ang mga mamahayag.

Ginsuportahan man sang korte ang mandu ni Justice Secretary Raul Gonzales nga dakpon kag pasakaan sang kaso ang sin-o man nga mamahayag nga magapamatuk sa mga mandu sa amo nga mga sitwasyon.

Samtang, nagapadayon ang kalakasan batuk sa mga myembro sang midya. Sadtong Hunyo 31, ginpatay sang mga wala nakilala nga lalaki si Fausto Sison, 60, isa ka brodkaster kag manunulat sa dyaryo sa Sariaya, Quezon. Pilason naman ang anak niya nga si Liwayway, isa man ka brokkaster. **AB**

## Magkadungan nga hublag-protesta sa Mindanao

NAGAABOT sa 100,000 pumuluyo ang dumagsa sa karsada sadtong Hulyo 28 sa lain-lain nga parte sang Mindanao para manawagan nga padayunon na ang nauntat nga sugilanon pangkalinungan sa tunga sang Moro Islamic Liberation Front (MILF) kag Gubyerno sang Republika sang Pilipinas (GRP).

Ang mga paghulag nga ginpangunahan sang militante nga Suara Bangsa-moro gintambungan lunsay sang mga Muslim kag Kristyano kag ginlunsar sa mga syudad sang Cotabato, Marawi, Iligan kag General Santos; sa Pikit, North Cotabato kag Basilan.

Luwas sa sugilanon pangkalinungan, nanawagan man ang militante nga grupo nga untaton na ang mga operasyon militar sa lain-lain nga parte sang Mindanao.

Halin sadtong una nga simana sang Hunyo napulo na ang nalista nga mga engkwentro sa tunga sang MILF kag militar sa rehiyon. Madamo na nga sibilyan ang nauwid kag daku nga numero na ang napilitan nga magbakwit sa ila mga puluy-an.

Nauntat ang sugilanon pangkalinungan sa tunga sang MILF kag GRP sang ipamilit sang rehimeng Arroyo nga dapat magsanto sa konstitusyon sang Pilipinas ang mga nakasugtan na sang magtimbang nga bahin sa sulod sang masobra tatlo ka tuig nga sugilanon.

Daku nga bahin sini ang halambalanon sang teritoryo nga dapat yara sa pagdumala sang mga Moro. Ginkaakig ini sang mga negosyador sang MILF.

Madumduman sadtong Mayo 12, bilang protesta sa indi paglarga sang sugilanon pangkalinungan ginpauli sang gubyerno sang Malaysia ang 28 sa 41 suldado kag upisyal sang pulisya sini nga kabahin sang International Monitoring Team. Nakadestino sila sa lain-lain nga lugar sa Mindanao agud bantayan ang untat-lupok nga ginkasugtan sang MILF kag GRP.

## Halos 80% sang presyo sang langis, ganansya sang kumpanya sa langis

ISA ka pagtuon bahin sa monopolyo sang pagpresyo sang langis ang nagapamatuod sa wala pagkabusog nga kadalok sang pangkalibutanon nga kartel sa langis sa kahalitan sang kinaandan nga pumuluyo.

Suno sa Ibon Foundation, isa ka institusyon sa pagpanalawsaw, tubtob 79% sang presyo sang langis amo ang nagabug-os sa supertubo sang mga dalagku nga kumpanya sa langis sining Mayo. Sa ginpagwa sini nga pagtuon, ginatantya nga ang tunay nga balor sang isa ka bariles sang krudo nga langis amo ang \$31-\$32 lang. Kwentado na sa balor nga ini ang gastos sa eksplorasyon, produksyon kag bayad sa Organization of Petroleum Exporting Countries (OPEC). Gani, sa bentahan nga \$146 sa pangkalibutanon nga balaligyaan, nagaganansya ang mga dalagku nga kumpanya sang tubtob \$115 kada bariles sang krudo nga langis.

Sa lokal nga balalaligyaan, ginatantya nga 47-54% sang presyo sang mga produkto nga petrolyo sadtong Hunyo 14 amo nga puro ganansya na sang mga kumpanya sa langis: P26-31 sa kada isa ka litro sang *unleaded gasoline*, kag P23-27 sa kada litro sang *diesel*.

## Tinawo sang Bureau of Customs, nagakita sang P500 M

NABUYAGYAG sining Hulyo ang pagdaya sang mga upisyal kag tinawo sang mga taga-Customs sa nakolekta nila nga buhis para makuripon nila ang padya nga ginahatag sang gubyerno kon makuha ukon nalampasan ang target nga koleksyon. Ang amo nga sistema nakasaad sa Lateral Attrition Law, nga ginhimo nga layi para kuno maengganyo ang maayo nga pagkolekta sang buhis.

Ang mga padya pamaagi man kuno para madugangan ang kita sang mga taga-Customs kag mabuhinan ang korapsyon.

Kabaliskaran subong ang nagakatabo bangud nangin dugang nga pamaagi pa ang layi para labi nga maglapta ang korapsyon sa buro.

Suno sa imbestigasyon sang Senado, sadtong 2006 pa lang ginpabayran na sang mga upisyal sang Bureau of Customs ang mga kumpanya sa langis ang ila buhis nga P2.2 bilyon para sa 2007 para paguwaon nga nalampasan sang buro sang amo nga kantidad ang ila target nga koleksyon nga P196 bilyon para sa 2006. Bangud diri nakabaton sila sang padya nga P537 milyon.

Nag-abot sa P402 milyon diri ang kwarta nga ginapagtag sa mga empleyado sang buro kag P135.7 ang *non-cash benefits*. Ang kantidad nga nagkadto kay Customs Commissioner Napoleon Morales P5,293,206.13 samtang ang mga drayber kag gwardya nakabaton sang P22,874.96.

## 5 milyon nga drayber sang trak sa India, naglunsar sang untat-byahe

LIMA ka milyon nga drayber sang trak sa India ang naglunsar sang wala limite nga untat-byahe nga ginsuguran sadtong Hulyo 2. Ang lapnagon nga welga nga ginpamunuan sang All India Motor Transport Congress ginlunsar bilang protesta sa nagapadayon nga pagtaas sang presyo sang langis, paghalog sang gubyerno sang kontrol sa presyo sang langis kag nagapadaku nga buhis nga ginapataw sa langis. Kadungan sini, ginatos man ang nagralli sa Madras, nabagatnan nga sydudad sang India.

Sadto pa nga nagtaliwan nga

tuig ginbuhinan na sang gubyerno sang India ang subsidyo sa langis nga nagresulta sa pagtaas sang presyo sang gasolina sang 10%. Bangud diri, nagaabot sa 40% ang gintaas sang presyo sang krudo kag gasolina pagsulod sang 2008.

Isa ka bulan antes ini, naglunsar man sang mga protesta sa mga estado sang West Bengal kag Kerala. Ginpamunuan ang mga ini sang Communist Party of India (Marxist), isa sa mga pangunahon nga alyado sang sentral nga gubyerno.

Samtang, ginatus-gatos man nga mga drayber sang trak sa United

Kingdom ang nagparada sang ila mga salakyan sa karsada pakadto sa parlamento bilang protesta sa pina-kaulihi nga pagtaas sang presyo sang langis sadtong Hulyo 2.

Ginduso nila ang pagbuhin sang buhis sa langis. Nagapangulba ang mga drayber nga madulaan sila sang trabaho bunga sang pagkabangkrap sang mga kumpanya nga indi na masaranggan ang mataas nga presyo sang mga produktong petrolyo.

Sa subong, ang presyo sang krudo sa United Kingdom \$10 kada litro kag katunga sini (\$5) buhis nga ginakolekta sang gubyerno.

## Prime minister sang Nepal, naghalin na sa pwesto

NAGPANAOG na sa pwesto si Girija Prasad Koirala bilang primer ministro sang Nepal sadtong Hunyo 26. Ini sang matapos maghalin ang mga ministro halin sa Communist Party of Nepal-Maoist (CPN-M) bilang pagpamatuk sa pagpabilin niya sa poder.

Suno sa mga komunista, indi na nagakabagay si Koirala nga mangin primer ministro bangud malayo nga nagapangaduha lang sa CPN-M ang iya Partido. Dugang pa diri, indi niya maayo nga natungdan ang iya katungdanan. Gusto sang CPN-M nga pagabotohon sang *constituent assembly* ang bag-ong presidente kag primer ministro sang pungsod. Nakuha sang mga Maoista ang mayorya sang gintukod nga *constituent assembly*.

Ang hitabo nga ini amo ang pinakaulihi lang sa madalom nga pangpulitika nga pagbag-o sa Nepal. Sadtong Mayo, pormal na nga ginsikway ang gatos-katuig na nga paghari sang monarkiya sa pungsod.

## Nagadaku nga kaswalti sang US kag mga alyado sini sa Afghanistan

MAS madamo na nga tropa sang US kag NATO ang napatay sa Afghanistan sangsa Iraq sining duha ka magkasunod nga bulan. Nag-abot na sa 40 ka dumuluong nga tropa, lakip ang 27 ka soldado nga Amerikano, ang napatay sining Hunyo sa pungsod bunga sang mga pagpanalakay sang lokal nga mga armadong gerilya. Ini ang ikaduha nga bulan nga mas madamo ang isip sang kaswalti sang mga soldado sang US sa Afghanistan kumparar sa Iraq.

Sadtong katapusan nga simana sang Hunyo, gin-ambus sang mga milisya nga Taliban ang isa ka komboy kon sa diin nawasak ang isa ka Humvee kag napatay ang tatlo ka soldado nga Amerikano kag isa ka *interpreter* nga Afghani.

Sadtong Hunyo man, ginreyd sang mga milisya ang isa ka presohan sa Kandahar kon sa diin ginbuy-an nila ang 886 preso lakip ang mga ginsuspetsahan nga Taliban. Ang Taliban ang nagapanguna nga pwera nga gerilya nga nagapakig-away sa pagpangsakop sang US sa Afghanistan.

## Pagpahalin sa trabaho sa US, nagadamo

NAGADAMO ang mga kumpanya nga nag-anunsyo sang pagpahalin sa trabaho sa US. Pinakaulihi nga nag-anunsyo amo ang Starbucks, sikat na restoran sang kape, kon sa diin 12,000 empleyado ang pahalinon kag 600 kalanan ang magasira sa bilog nga US. Gin-anunsyo man sang Chrysler, isa ka daku nga kumpanya nga nagahimo sang kotse, nga magapahalin ini sang 2,400 empleyado. Ginatantya nga nagalab-ot na sa 9.7% ang nawad-an sang trabaho sini nga tuig sa US. Lakip sa mga kumpanya ang may ara na nga madamuan nga pagpahalin amo ang ara sa konstruksyon, negosyo sa pabalay kag lupa, pinansya, industriya sang salakyan kag manupaktura. Indi lang mga ordinaryo nga empleyado ang napahalin kundi pati mga ara sa maneydsment.


Ginahambal sang pila ka ekonomista sa US nga sa baylo nga klasiko nga resesyon ang makita kon sa diin tunga tubtub tatlong kwarto sang pagkaputo ang pagabasehan sang resesyon, ang mabatyagan sang ekonomya sang US amo ang duha ka tuig nga wala sang pag-uswag kadungan sang paghina sang merkado. Sa sini, mas malala ang disempleyo kag ang pag-antus sang pumuluyo. Kadungan pa sini ang madasig nga pagtaas sang presyo sang mga balaklon.

Anum ka bulan nga sunud-sunod ang pagpahalin sang mga empleyado sa mga kumpanya sa US. Ginatantya nga nag-abot na sa 440,000 ang nawad-an sang trabaho umpisa sadtong Enero. Maluwas sini, nagbuhin sang mga sweldo kag oras sa pagtrabaho ang mga kumpanya nga nabudlayan makalampuwas sa mahina nga negosyohanay.

## Cuba, nakahimo sang bakuna sa lung cancer

GINPAGWA na sang Cuba ang isa ka bakuna para sa baga (*lung cancer vaccine*). Ini ang pinakauna nga bakuna nga nahimo para sa kanser. Nag-umpisa ang pagtilaw sa tawo sadtong 1995 kag ginpahanugutan na nga ihatag ang bakuna sa mga may balatian, suno sa Havana Molecular Immunological Center, ang nagtukib sang bakuna. Natilawan naman ini sa mga ospital sa India, Singapore, Britain, Canada kag anum pa ka pungsod.

Ang bakuna nga ini wala sang mga katuwang nga malain nga epekto kag mahimo idungan sa mga daan na nga bulong sa kanser pareho sang *chemotherapy*. Daku man ang mabulig sini sa pagbuhin sa grabe nga sakit nga dala sang kanser. Ginatantya nga palawigon ang kabuhi sang may balatian sang anum ka bulan. Ang bakuna nga ini ginabaligya man sang Cuba sa Latin America.

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Tuig XXXIX Blg. 13  
Hulyo 7, 2008  
[www.philippinerevolution.net](http://www.philippinerevolution.net)

Editoryal

## Gloria Arroyo—tuta na, wala sang balatyagon pa

**M**akasuluka kag makaulugot ang ginapakita nga sobra nga pag-ikog-ikog ni Arroyo sa iya impyeralisya nga amo sang magbisita siya sa US sining ulihi nga simana sang Hunyo. Sa kainitan sang pagpanghalit sang bagyo “Frank” sa Pilipinas, ginpatuyangan ni Arroyo ang kabang-manggad sang banwa sa wala kapuslanan, magasto kag garboso nga pagbyahe. Lapnagon nga kaakig kag wala-tuo nga pagpakamalaut ang ginbunga sang sobra niya nga wala pagkabalaka sa interes sang nagakalisod nga pumuluyong Pilipino. Gintinguhaan nga pugaon ni Arroyo ang anuman nga mapuga pa halin sa pagpakigkita niya sa iya amo nga si George W. Bush nga pareho niya ara sa nagahinunod na ang kagamhanan. Nag-amot ang iya amo sang haluson \$100,000 kag ginpadala ang nukleyar nga barko-de-gera nga USS Ronald Reagan bilang bulig kuno sang US sa mga biktima sang bagyo “Frank” kag paglugdang sang pangpasahero nga barko nga MV Princess of the Stars.

Pero ang labi nga ginapuntirya ni Arroyo sa pagkadto sa US amo ang temprano nga paglangis sa duha ka pangunahon nga kandidato sa eleksyon presidensyal didto subong nga tuig—sanday John McCain sang Republican Party ni Bush kag Barack Obama sang oposisyon nga Democratic Party. Sa pilit nga paglagas nga mahatagan siya sang pagta-

mod sang mga ini, daw langaw si Arroyo nga nagasunod-sunod kon sa diin may masimhutan nga pagkaon. Samtang, sige naman ang paglikaw sa iya sang duha ka kandidato. Sang ulihi ginsapak na lang siya sang sulat kag malip-ot nga tawag sa telepono ni Obama kag pila ka minutos nga pagpakigkita ni McCain. Sa Nobyembre pa ang eleksyon presidensyal sa US, pero subong pa lamang nagadilap na si Arroyo sa buli sang mga pangunahon nga kandidato didto para makasiguro

siya sang suporta sang sin-o man nga magadaug sa ila. Naga-laum si Arroyo nga pagasuportahan sang



**Mga tampok sa  
isyu nga ini...**

**17 armas nakumpiska  
sg BHB sa mga reyd**  
PAHINA 5

**Kampanya nga  
literasiya sa tunga sg  
gera**  
PAHINA 7

**Ikatlong asembliya  
sg ILPS, ginhilwat**  
PAHINA 11



## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*